

Abdullah mulakan sambutan

YAM - 11/5/2006
JOHOR BAHRU 10 Mei - Presiden UMNO, Datuk Seri Abdullah Ahmad Badawi akan memulakan sambutan Ulang Tahun UMNO Ke-60 di Istana Besar di sini pada pukul 10 pagi esok.

Ketibaan beliau akan disambut oleh Timbalannya, Datuk Seri Najib Tun Razak dan Naib-Naib Presiden UMNO serta kalangan ahli tertinggi dan para pemimpin parti yang lain.

Mereka kemudiannya akan diarak oleh 210 ahli UMNO terdiri daripada pembawa bunga manggar, pembawa bunga telur serta bunga pahar ke tapak perhimpunan di Istana Besar.

Sebaik tiba di tapak perhimpunan, Abdullah akan melakukan pemeriksaan perbarisan terdiri daripada 180 ahli Pemuda, Puteri serta Wanita UMNO.

Ini diikuti acara menaikkan bendera UMNO sambil diiringi nyanyian lagu *Negaraku* dan UMNO oleh koir Maktab Perguruan Temenggung Ibrahim.

Ketua Pemuda UMNO Johor, Razali Ibrahim akan membacakan ikrar ahli UMNO sambil melaungkan *Hidup Melayu* sebanyak tiga kali sebelum artis veteran, Datuk Rahim Razali membacakan perutusan Datuk Onn Jaafar.

Perutusan tersebut adalah yang sama dibacakan oleh pengasas UMNO itu 60 tahun lalu.

Orang ramai di tapak perhimpunan itu kemudiannya akan dipertontonkan dengan tayangan audio visual mengenai sejarah penubuhan UMNO sehingga negara mencapai kemerdekaan.

Mufti Johor, Datuk Nooh Gadot kemudian akan membacakan doa sebelum majlis dimulakan.

Sebaik selesai bacaan doa, Pengerusi Badan Perhubungan UMNO Johor, Datuk Abdul Ghani Othman akan menyampaikan ucapan disusuli pula ucapan Presiden UMNO.

Sebanyak 60 ekor burung terdiri daripada pipit, tekukur dan merbuk bersama 2,000 belon akan dilepaskan selepas ucapan Presiden parti selesai.

Abdullah juga akan menyampaikan anugerah Tokoh Terbilang kepada ahli UMNO yang telah berjasa kepada perjuangan UMNO sebelum ini.

Presiden UMNO kemudian akan memukul gendang besar sebagai menandakan sambutan Ulang Tahun UMNO Ke-60 bermula sambil diiringi kumpulan pukulan gendang dan kompang.

Pada kira-kira pukul 12.30 tengah hari, Sultan Johor, Sultan Iskandar Almarhum Sultan Ismail tiba di pekarangan Istana Besar yang akan diiringi oleh Abdullah dan ahli Majlis Tertinggi UMNO.

Baginda kemudian akan menandatangani plak perisytiharan sebagai simbolik seperti yang dilakukan oleh Almarhum Sultan Ismail ketika merasmikan penubuhan UMNO pada 11 Mei 1946.